

甯陵縣志卷之七

名宦志

守官非弋名也守官而近名雖有措置文焉已耳夫一行作吏慮無不殫精竭慮智盡能索以與斯邑籌利害計安全以盡其職之所當爲申其志之所欲出卽日報稱盡是而堂上百里幽隱甯畢燭哉而敢以爲市也且生平之所奏效者安在哉迫則患其擾也而戴星者謂何寬則患其縱也而臥治者謂何猛則患其殘也而火烈者謂何而得以爲名高也雖然武城不皆子游河陽不皆潘岳宦者衆矣名者幾何召伯之芟愛及甘棠民有餘思焉君子因其人考其事而遂以得其用意之所在詩曰高山仰止景行行止雖不能至然心竊嚮往之此名宦之所以志也夫此名宦之所以志也夫

東漢桓鸞字始春龍亢人舒侯相良龍之子也少立操行緇袍糟食不求贏餘

甯陵縣志

卷之七 名宦

二十六

貞亮之性著乎幼冲學覽六經莫不貫綜推財孤寡分賄友朋泰於待賢狹於養己以世濁州郡多非其人恥不肯仕年四十餘時太守向苗有名迹乃舉鸞孝廉遷爲膠東令始到官而苗卒鸞卽去職奔喪終三年然後歸淮汝之間高其義後爲己吾縣令長旬月遷河內汲令甚有名迹諸公並薦復徵辟拜議郎上陳五事舉賢才審授用黜佞倖省苑囿息役賦書奏以牾內豎故不省尋以病免中平元年年七十七卒於家

見漢書

唐張巡南陽人聰悟有才幹志氣高邁不等庸俗開元末舉進士調清河令天寶中知真源安祿山之反也巡帥吏民哭於玄元廟選兵千人西至雍邱與賈贄合贄敗死巡總領其衆守雍邱六十日大小三百餘戰賊敗走軍聲大振時賊將楊朝宗欲襲甯陵以斷巡後巡遂拔雍邱東守甯陵以待之始與睢陽太守許遠相見是日朝宗果至巡遠與戰晝夜數十合大破走之斬將二十殺萬餘人時天寶十五載十一月也遠尋歸睢陽巡留

守甯陵賊不敢犯肅宗至德二載春正月賊將尹子奇寇睢陽許遠告急巡自甯陵引兵應之至睢陽督厲將士晝夜苦戰凡十六日擒賊將六十人殺士卒二萬餘衆氣日倍尹子奇屺敗而復至者四遂將兵十餘萬久圍睢陽時城中食盡餽援不至雀鼠紙革不足以供巡殺愛妾以饗軍士死者十之九所餘僅四百人皆莫能起巡向西慟哭再拜曰臣力竭矣生無以報陛下死當爲厲鬼以殺賊冬十月尹子奇陷睢陽巡與許遠等死之金尹升卿大定中爲甯陵令有遺以苞苴者輒罪其修廢典革弊習多所裨益當道以廉能舉例當陞除士民以公之去爲憂金主云廉能者卽與陞除無以慰百姓愛留之心但命進升卿官仍知甯陵

王渥太原人性明俊不羈博學善談乾興中進士爲甯陵令卓有治迹遷右司都事惜事功失傳

元董文貞字幹臣河間獻縣人父元舉進士累官中大夫貞襲父職至元間

甯陵縣志

卷之七 名宦

二十七

調甯陵達魯花赤邑苦剽掠公教民習武備境中以甯歲蝗公齋戒禱之輒飛去不爲害居官計口受俸餘辭不受後遷蘭陽令以禮折獄質馬醫民後乞休家甯陵乃卒葬於邑北之楮園村邑人思之因名其墓曰董公塋

趙璧兖州人至治中爲甯陵令值歲大歉民流離殍疫者甚衆公以災聞於當道者二再賜蠲賑不足則捐俸以濟之全活者數千人明年春雨稍時公攜吏卒各一人自裹糗構勸課農桑事尙簡易惟恐擾民府有疑獄輒使決之一訊卽得其情四方冤民莫不願直於公者夏大蝗公以文禳之一夕出境其蠲不能去者皆抱草死害不及穀公用法嚴明民不患盜在邑二載以陞任去士民爲去思碑以頌之

明蔡祥北京人廉幹正直撫民有方賦役均平訟獄自息當道薦其才陞知隴州士民思之

王孟嘗江西安福人歲貢賦性廉平守正奉法遇災則責躬修省期誠意以回天心儒學壞民力不能新公捐俸助之故人有干以私者公略無鄉曲意由此人益憚之後卒於官士民爲之流涕

楊輔直隸邳州人舉進士爲甯陵令老成安靜謙已下賢爲民之意惻如也夏大旱公麻履素服行禱於聖水廟蓋減食修省者浹辰霖雨如注是歲大稔時部署以公在甯陵不盡所長調知金華縣百姓莫不泫然以悲乃易其雙鳥以識遺思云

王潮山西隰州人老成率真一介不取堂東有隙地圍分許自藝蔬菜日用取給焉餘則分予諸生之貧者以布袍敝履來迄去邑不能易居官八月值北觀瀕行邑民往往以百錢贈之公固辭曰媿無後澤又此去無來路矣二三子何望而遺我耶予不敢受不報之施百姓環泣而別時仕途無寒官公果不來

甯陵縣志

卷之七 名宦

二十八

石陘青城人小心畏慎廉靜執方嘉靖癸丑柘寇師尙詔將謀不軌公偵之聞於當道時臺司相觀望忍不敢發郡之長貳爲其賄所羅也遂玩不爲備公以爲憂乃飭武備率衆登陴守之踰月果有歸德之變公日夜厲循勤苦爲士民先至西門禱於關武安曰寇壘環郊赤子有屠城之懼使石陘不仁甯無噍類我家無殃及萬姓以貽神羞因泣下不能語衆皆泣寇謀知之遂不敢西向後公坐誣去士民遮留遠送哭聲震野舟人爲之墮淚

熊秉元號可山江西豐城人由進士嘉靖年間以刑部主事謫任甯陵公下車之日卽以振衰起敝爲己任首先教養惜閭閻之子貧窮失教城內創建社學二處四關四處七鄉七處勸輸社學田二十二處共地十五頃三十畝建學延師嚴稽勤課而城市鄉黨絃誦相聞又於增修預備官倉之外鼓舞義民創建社倉一處不匝月而輸粟者二千石民不憂歲甯昔

照地貢賦正項之外別無雜派自邑令陳炫至凡上司過客極意逢迎民不堪命公至盡革除之甯前城內東南地窪道路不通居民寥寥每致失事盜飄忽莫能問公詳請除舊街之外新開街巷八道鑿水門二處備畜洩招民墊基居住自此而熙穰漸盛登陴稱便甯享萬世之利益未之知也至於修學廟興廢祠增公廨建申明旌善等亭設陰陽醫等學置古今歷代書籍十六部共六百三十本所費不貲皆有關政教者也且甯原無志公戚然切固陋之悲廣搜博采出徐君琦之夙藏加學博陳君之載籍又假以呂司寇之刪定甯居然文獻之邦也迄今續往牒者亦有所本非公之遺澤與任吾甯者代不乏人功德何克殫述但如公者乃千百年所僅見者也名宦一席難償其德席蔭者當重思所報云

按東關舊有秦公祠經亂焚毀邑人李若星重修設主併祀熊公於內秦霑江南崑山縣人由舉人任福建德化縣知縣復除甯陵舊傳因爭辯

甯陵縣志

卷之七 名宦

二十九

睢陽三衛軍屯地而病故失攷邑人建祠於東關名遺愛祠見祠廟志今並祀熊公者是

劉懋號養衷陝西西安府臨潼縣人萬歷癸丑進士由項城調任甯陵公性寬和正直廉明仁恕不立崖岸不徇局套勤實改革陋規恤民造士省刑薄斂聽斷之餘無事不主和平但遇勦法者獨堅執不爲搖廉介自矢三年如一日曾未有敢以苞苴嘗者胥吏畏若神君士民戴如父母以丁外艱去任之日傾國遮道囊橐蕭然隨從僅兩騎乘殊不似爲宦遊者然邑人作廟肖像尸祝於西甕城內扁其堂曰眞民父母見祠廟志
續修

國朝

栗毓美字友梅山西渾源州人由拔貢官河南除知甯陵前因嘉慶十八年河決宋家堂概縣被淹城潰民多溺死逾年合龍沙壓河站弱半不毛

公甫下車惻然民瘼申請上憲奏准豁免錢糧有差實政惠民仕至東河總督砌甃成壩堅而費省五年河不爲患道光二十年卒於官

賜祭葬贈太子太保謚恭勤封巡河督大王立廟甯民思公不置崇祀名宦祠

典史增附

劉大才陝西富平人邑典史管縣事明季城毀率衆修之後寇至無患公之力也旌忠烈禮有功德於民則祀之崇祿旌忠廟康熙四十七年建碑碑在廟中今存

按公修城禦寇保障甯人甘棠遺愛沒世不忘旌忠一席何減名宦哉因附志之

儒學名宦

明岳民庇懷慶府溫縣人崇禎間以明經司邑訓導賦性質直課士有方秉鐸二載咸仰師範壬午流寇東犯誓守危疆城破之日賊脅以利刃不屈

甯陵縣志

卷之七 名宦

三十

遂雉經死士子佩其德訓迄今猶泣頌不衰後闔邑公舉崇祀名宦

司訓無守土之責而岳民庇當逆闖陷城之日義可以去顧乃堅守不懈雉經捐軀生氣何凜凜也無媿蒸嘗有光俎豆信不誣云 存舊

主簿名宦

宋苗時中字子居宿州人熙甯初主甯陵簿邑舊有汴河民甚賴之後爲黃河所堙公因故道而疏鑿焉民不憂旱者數十年

宦至主簿微矣乃以疏復汴河名厥政績感而祀之於以明德罔小而必慶且以知民情之大可見也如曰卑官小職無以自効嗚呼其果無以自効也哉

武臣名宦

唐劉昌字公明汴州開封府人善騎射天寶末從河南防禦使張介然討安祿山授易州遂城府左果毅史朝義兵圍宋州食盡且降昌說刺史李岑

曰李光弼在河陽江淮足兵勢必來援今廩麪尙多若屑以食可支二十日則救至岑聽之昌乃被鎧登城以忠義諭賊賊畏不敢攻俄而光弼援軍至賊夜潰光弼聞其謀召置軍中將用之會光弼卒還爲宋州平門將李靈耀以汴州反刺史李僧惠欲應之昌請見陳順逆計且泣僧惠悟卽馳奏請自將討賊故靈耀失助不得逞汴州平李忠臣疾僧惠功殺之昌遁去劉元佐領宣武節度使擢昌左廂兵馬使李納反以偏師收考城充行營諸軍馬步都虞侯元佐攻濮州以昌攝刺史李希烈取汴元佐別將高翼提精卒守襄邑城陷翼赴水死江淮大震昌以兵三千守甯陵希烈衆五萬攻之昌掘塹以遏地道相拒凡四十餘日賊數敗乃解圍去更攻陳州昌從元佐以浙西兵三萬救之去陳五十里昌薄其軍大戰破之擒賊將翟曜希烈奔還蔡州加檢校工部尙書累封南川郡王昌在邊凡十五年身率士墾田三年而軍有羨食兵械精好邊障安甯及感疾詔赴京

甯陵縣志

卷之七 名宦

三十一

師未行卒年六十五贈司空贊曰唐杜牧稱甯陵之解圍劉元佐召昌問曰君以孤城用一當十何以能守昌泣曰始昌令守陴內顧者斬昌孤甥張俊守西北未嘗內顧猝下斬之士有死志故能守因伏地流涕元佐亦泣曰國家將富貴汝史臣謂不然且勒兵乘城與賊抗所賴賞罰耳今無罪而斬其甥志且離不祥莫大焉甯好事者傳此以益其美非昌志也牧以爲張巡許遠陷睢陽其名傳昌全甯陵而事不得暴於世甯牧未之思

耶 見唐書

唐高彥昭

李翱文集作王彥昭

劉元佐之裨將也建中二年田悅反質彥昭之妻李氏

子某女妹妹而刼彥昭守濮陽彥昭以濮歸天子妻子遂遇害時妹妹方七歲賊欲舍之妹妹激憤出忠孝語如成人問父所在西向拜哭尋就死天子哀之謚曰愍四年李希烈叛元佐命彥昭與劉昌守甯陵及襄陳連破賊乘勝徑薄甯陵舟乘脚踵進互七十里彥昭與昌嬰壘以待賊使妖

人祈風火戰棚盡坎堞欲登彥昭按劍乘陴士感奮風亦反昌計於衆曰軍法倍不戰賊猥吾寡不如退以驕賊自宋出精兵擣不意功可成彥昭謝曰君少待請盡力乃登城誓衆曰中丞欲示弱覆而取之誠善然我爲守得失在主人今士創重者須供養有如棄城去則傷者死內逃者死外吾衆盡矣士皆泣下拜曰公在是誰敢言去昌大慙彥昭擊家牛犒軍士死戰斬首三千級請援於元佐其屬作書言城且危彥昭視曰君輕我耶取紙自爲書元佐得書喜曰健將在西吾何憂乃選兵八百夜艾而入賊不知詰旦傳城士奮出希烈大敗取其旆斬首萬級追北至襄邑收賊貲糧而還軍聲大振自是賊不復犯甯陵元佐表其功拜彥昭御史大夫實封五百戶

見唐書李希烈傳

王栖曜濮陽人守甯有軍功事未詳

曲環山西安邑人客隴右少善兵法資勇敢善騎射李希烈陷汴州環守

甯陵縣志

卷之七 名宦

三十一

甯陵戰陳州斬賊三萬五千級擒其將翟崇暉進檢校工部尙書兼陳州刺史希烈平改陳許節度賜封三百戶二州比爲寇衝民苦剽鹵客他縣環謹身節用寬賦斂簡條教不三歲歸者襁係訓農治兵穀食豐衍轉檢校尙書左僕射貞元十五年卒年七十四贈司空

見唐書

柏良器字公亮魏州人父造以獲嘉令死安祿山難乃學擊劍欲報賊父友王奐爲光弼從事薦之光弼授兵平山越遷武衛中郎將時年二十四更戰陣六十二李希烈圍甯陵遏水灌之親令軍中明日拔城良器以救兵至擇弩手善遊者沿汴渠夜及旦伏弩發賊乘城者皆死錄功封平原郡王入爲左神策軍大將軍知軍事圖形凌煙閣終左領軍衛大將軍贈

陝州大都督

見唐書

明溫良山西榆林人保定總督右翼營遊擊崇禎末年盜賊蜂起東西南北往來飄忽無虛日所至如入無人之境時有東來土寇混名一條龍盤居

邑東北之趙村集計將薄城良奉上臺檄師援虞城過甯邑衆求移兵擊之寇謀知西遁良夜襲之達旦至邑西北三十里趙二莊賊失備殺斬甚衆狼狽西奔至汴南撲滅焉良勇悍出衆號令嚴明所到之處鷄犬不驚軍士凱還獲賊輜重各分酬所主之家凡餉兵之家兒童嬉聚妻孥晏然若不知有兵者良偶抱病猶疾趨解虞城圍賊遁不意病劇不祿虞人慟哭罷市祀名宦祠甯實佩德獨忘報耶宜並祀之

祀典曰有功德於民者則祀之所以誌不忘也按舊志劉昌高彥昭等六人皆以身捍城池禦民於難不必盡有專城之寄而公爾忘私厥功偉焉其事實時散見於書傳中可攷而知也但舊志與名宦雜紀今別而傳之綴於名宦後以與善斯土者同志不朽云

續修

國朝

甯陵縣志

卷之七 名宦

三十三

邱聯恩閩人世襲一等子爵累遷南陽鎮總兵加提督銜勇敢有謀咸豐三年粵匪犯豫土匪皖匪交訌聯恩屢立戰功八年冬 朝廷諭巡撫恆福集精兵令聯恩將之九年春賊陷甯陵城睢州城破平樂砦郭屯砦圍張弓集砦垂危聯恩督兵赴援殺賊其衆賊西竄時二月十七日也聯恩追賊至舞陽北舞渡二十五日陣亡事 聞照提督例從優議卹同難者山西參將福瑞等二十一員詳豫軍紀略聯恩故將家子束髮從戎每戰必先在豫勦匪有年羣賊憚之如虎馭兵嚴而有律士民愛戴依若長城後撫軍瑛瑒奏請祠祀張弓集公建祠祀 附志

陝西延安營守戎某公不詳姓名何許人咸豐九年二月十一日率兵二百過甯捻匪攻城知縣龍德照請留戰禦次日城陷裨將某死於城南河岸公馬上倉猝失刀急覓不得賊騎擊之墜馬死 附志

鄉賢姓名 行實詳人物志中

田王孫

葛龔

張遷

夏侯詵

劉思立

劉憲

劉熙古

劉蒙正

劉蒙叟

程迴

范仲淹

喬恕

呂坤從祀文廟西廡

苗文英

王印

喬進璠

呂真知

王應登

翟三策

盧宗泰

劉景世

符希孟

李學恕

曹有謨

甯陵縣志

卷之七 名宦

三十四

呂慎多

呂崇謚增

符兆熊增

太史傳伯夷曰夷齊賢得夫子而名益彰淵雖篤學附驥尾而行益顯今按甯陵鄉賢實求其爲人道德文章經濟事業如唐宋之諸劉暨程呂先後沙隨皆於聖人之道實有所得故其所自樹立無所苟雖與日月爭光可也其他皆志行矯矯亦與吾道有所發明卽舍生取義類有古烈士風概之以賢具體一體不妨各彰於世概之以鄉隘矣雖然猶是生於鄉者也而况祠而祀之之安在孔子之徒不必無優劣得附於聖人之門者蓋亦難矣鄉賢之所重不在彼而在此